

全本

二十四史

梁周北
书书史
北南隋
齐书史书



(唐)李延寿 著

北史

延边人民出版社

北史目录

北史卷一	魏本纪第一	(1)
北史卷二	魏本纪第二	(7)
北史卷三	魏本纪第三	(14)
北史卷四	魏本纪第四	(21)
北史卷五	魏本纪第五	(26)
北史卷六	齐本纪上第六	(33)
北史卷七	齐本纪中第七	(39)
北史卷八	齐本纪下第八	(45)
北史卷九	周本纪上第九	(49)
北史卷十	周本纪下第十	(55)
北史卷十一	隋本纪上第十一	(62)
北史卷十二	隋本纪下第十二	(69)
北史卷十三	列传第一	(76)
北史卷十四	列传第二	(81)
北史卷十五	列传第三	(85)
北史卷十六	列传第四	(92)
北史卷十七	列传第五	(98)
北史卷十八	列传第六	(102)
北史卷十九	列传第七	(107)
北史卷二十	列传第八	(114)
北史卷二十一	列传第九	(120)
北史卷二十二	列传第十	(126)
北史卷二十三	列传第十一	(131)
北史卷二十四	列传第十二	(136)
北史卷二十五	列传第十三	(143)
北史卷二十六	列传第十四	(147)
北史卷二十七	列传第十五	(152)
北史卷二十八	列传第十六	(158)
北史卷二十九	列传第十七	(163)
北史卷三十	列传第十八	(168)
北史卷三十一	列传第十九	(176)
北史卷三十二	列传第二十	(182)
北史卷三十三	列传第二十一	(189)
北史卷三十四	列传第二十二	(197)
北史卷三十五	列传第二十三	(203)
北史卷三十六	列传第二十四	(209)
北史卷三十七	列传第二十五	(213)

北史卷三十八	列传第二十六	(217)
北史卷三十九	列传第二十七	(223)
北史卷四十	列传第二十八	(228)
北史卷四十一	列传第二十九	(235)
北史卷四十二	列传第三十	(244)
北史卷四十三	列传第三十一	(249)
北史卷四十四	列传第三十二	(257)
北史卷四十五	列传第三十三	(262)
北史卷四十六	列传第三十四	(268)
北史卷四十七	列传第三十五	(272)
北史卷四十八	列传第三十六	(278)
北史卷四十九	列传第三十七	(283)
北史卷五十	列传第三十八	(289)
北史卷五十一	列传第三十九	(293)
北史卷五十二	列传第四十	(298)
北史卷五十三	列传第四十一	(301)
北史卷五十四	列传第四十二	(307)
北史卷五十五	列传第四十三	(313)
北史卷五十六	列传第四十四	(320)
北史卷五十七	列传第四十五	(325)
北史卷五十八	列传第四十六	(329)
北史卷五十九	列传第四十七	(332)
北史卷六十	列传第四十八	(335)
北史卷六十一	列传第四十九	(340)
北史卷六十二	列传第五十	(346)
北史卷六十三	列传第五十一	(351)
北史卷六十四	列传第五十二	(356)
北史卷六十五	列传第五十三	(362)
北史卷六十六	列传第五十四	(365)
北史卷六十七	列传第五十五	(368)
北史卷六十八	列传第五十六	(371)
北史卷六十九	列传第五十七	(375)
北史卷七十	列传第五十八	(379)
北史卷七十一	列传第五十九	(384)
北史卷七十二	列传第六十	(391)
北史卷七十三	列传第六十一	(395)
北史卷七十四	列传第六十二	(399)
北史卷七十五	列传第六十三	(403)
北史卷七十六	列传第六十四	(407)
北史卷七十七	列传第六十五	(410)
北史卷七十八	列传第六十六	(414)

北史卷七十九	列传第六十七.....	(417)
北史卷八十	列传第六十八.....	(420)
北史卷八十一	列传第六十九.....	(425)
北史卷八十二	列传第七十.....	(431)
北史卷八十三	列传第七十一.....	(436)
北史卷八十四	列传第七十二.....	(444)
北史卷八十五	列传第七十三.....	(446)
北史卷八十六	列传第七十四.....	(450)
北史卷八十七	列传第七十五.....	(454)
北史卷八十八	列传第七十六.....	(456)
北史卷八十九	列传第七十七.....	(458)
北史卷九十	列传第七十八.....	(466)
北史卷九十一	列传第七十九.....	(470)
北史卷九十二	列传第八十.....	(473)
北史卷九十三	列传第八十一.....	(481)
北史卷九十四	列传第八十二.....	(488)
北史卷九十五	列传第八十三.....	(493)
北史卷九十六	列传第八十四.....	(496)
北史卷九十七	列传第八十五.....	(501)
北史卷九十八	列传第八十六.....	(507)
北史卷九十九	列传第八十七.....	(513)
北史卷一百	列传第八十八.....	(517)

北史卷一

魏本纪第一

魏之先出自黄帝轩辕氏，黄帝子曰昌意，昌意之少子受封北国，有大鲜卑山，因以为号。其后世为君长，统幽都之北，广漠之野，畜牧迁徙，射猎为业，淳朴为俗，简易为化，不为文字，刻木结绳而已。时事远近，人相传授，如史官之纪录焉。黄帝以土德王，北俗谓土为托，谓后为跋，故以为氏。其裔始均，仕尧时，逐女魃于弱水，北人赖其勋，舜命为田祖。历三代至秦、汉，獯鬻、猃狁、山戎、匈奴之属，累代作害中州，而始均之裔不交南夏，是以载籍无闻。

积六七十代，至成皇帝讳毛立，统国三十六，大姓九十九，威振北方。成帝崩，节皇帝贷立。节帝崩，庄皇帝观立。庄帝崩，明皇帝楼立。明帝崩，安皇帝越立。安帝崩，宣皇帝推寅立。

宣帝南迁大泽，方千余里，厥土昏冥沮洳，谋更南徙，未行而崩。景皇帝利立。景帝崩，元皇帝俟立。元帝崩，和皇帝肆立。和帝崩，定皇帝机立。定帝崩，僖皇帝盖立。僖帝崩，威皇帝僧立。威帝崩，献皇帝邻立。

时有神人，言此土荒遐，宜徙建都邑。献帝年老，乃以位授子圣武皇帝，命南移，山谷高深，九难八阻，于是欲止。有神兽似马，其声类牛，导引历年乃出，始居匈奴故地。其迁徙策略多出宣、献二帝，故时人并号曰推寅，盖俗云钻研之义。

圣武皇帝讳诘汾。尝田于山泽，欻见輶辇自天而下。既至，见美妇人自称天女，受命相偶。旦日请还，期年周时复会于此。言终而别。及期，帝至先田处，果见天女，以所生男授帝，曰：“此君之子也，当世为帝王。”语讫而去。即始祖神元皇帝也。故时人谚曰：“诘汾皇帝无妇家，力微皇帝无舅家。”帝崩，神元皇帝立。

神元皇帝讳力微。元年，岁在庚子。先是西部内侵，依于没鹿回部大人寔寔。神元有雄杰之度。后与寔寔攻西部，寔寔军败，失马步走，神元使以所乘骏马给之。寔寔归，求马主，帝隐而不言。寔寔后知，大惊，将分国之半奉帝，帝不受，乃进其爱女。寔寔犹思报恩，乃从帝所欲，徙所部北居长川。积数年，旧部人咸来归附。及寔寔临终，戒其二子，使谨奉神元。其子不从，乃阴谋逆。帝召杀之，尽并其众，诸部大人悉服，控弦之士二十余万。

三十九年，迁于定襄之盛乐。四月祭天，诸部君长皆来助祭，唯白部大人观望不至，征而戮之，远近肃然。帝乃告诸大人，为与魏和亲计。

四十二年，遣子文帝如魏，且观风土。是岁，魏景元二年也。

文帝讳沙陁汗，以国太子留洛阳。后文帝以神元春秋已高，求归，晋武帝具礼护送。五十六年，文帝复如晋，其冬还国。晋征北将军卫瑾以文帝雄异，恐为后患，请留不遣，复请以金锦赂国之大人，令致间隙。五十八年方遣帝。神元使诸部大人谓阴馆迎帝。酒酣，帝仰视飞鸟，飞丸落之。时国俗无弹，众大惊，相谓曰：“太子被服同南夏，兼奇术绝人，若继国统，变易旧俗，吾等必不得志。”乃谋危害帝。并先驰还，曰：“太子引空弓而落飞鸟，似得晋人异法。”自帝在晋后，诸子受宠，神元颇有所惑。及闻诸大人请，因曰：“当便除之。”于是诸大人驰诣塞南，矫害帝。

其年，神元不豫。乌丸王库贤亲近任势，先受卫瑾之货，欲沮动诸部，因于庭中砺钺斧，曰：“上恨汝曹谋杀太子，欲尽收诸大人长子杀之。”大人皆信，各各散走。神元寻崩，凡建国五十八年，年一百四岁。道武帝即位，尊为始祖。

子章皇帝悉鹿立，时诸部离叛。帝九年而崩。

弟平皇帝肆立，七年而崩。

文帝少子思皇帝立。思皇帝讳弗。政崇宽简，百姓怀服。一年而崩。

神元子昭帝禄官立。帝元年，分国为三部。一居上谷北，濡源西，东接宇文部，自统之。一居代郡之参合陂北，使文帝长子桓帝讳猗包统之。一居定襄之盛乐故城，使桓帝弟穆帝猗卢统之。

自神元以来，与晋和好。是岁，穆帝始出并州，迁杂胡北徙云中、五原、朔方。又西度河，击匈奴、乌丸诸部。自杏城以北八十里迄长城原，夹道立碣，与晋分界。

二年，葬文帝及皇后封氏。初，思帝欲改葬，未果而崩，至是遂成前意焉。

三年，桓帝度漠北巡，因西略诸国，凡积五岁，诸部降附者三十余国。桓帝英杰魁岸，马不能胜，常乘安车，驾大牛，牛角容一石。帝曾中蛊，呕吐之地仍生榆，参合陂土无榆，故时人异之。

十年，匈奴别种刘元海反晋于离石，自号汉王。并州刺史司马腾来乞师，桓帝与帝大举以助之，大破元海众于西河、上党。桓帝与腾盟于汾东而还，乃使辅相卫雄、段繁于参合陂西累石为亭，树碑以记行焉。

十一年，晋假桓帝大单于金印紫绶。是岁，桓帝崩。桓帝统部凡十一年。后定襄侯卫操树碑于大郿城，以颂功德。子普根代立。

十三年，昭帝崩。穆帝遂总摄三部为一统。

帝天安英峙，勇略过人。元年，刘元海僭帝号，自称大汉。

三年，晋并州刺史刘琨遣子遵为质，乞师。帝使弟子平文皇帝助琨破白部大人，次攻铁弗刘武。晋怀帝进帝大单于，封代公。帝以封邑去国县远，从琨求句注陁北地。琨大喜，乃徙马邑、阴馆、楼烦、繁峙、崞五县人于陁南，更立城邑，尽献其地，东接代郡，西连西河、朔方数百里。帝乃徙十万家以充之。

六年，城盛乐以为北都，修故平城以为南都。帝登平城西山，观望地势，乃更南百里，于淩水之阳黄瓜堆筑新平城，晋人谓之小平城，使子六脩镇之，统领南部。

八年，晋愍帝进帝为代王，置官属，食代、常山二郡。先是国俗宽简，至是明刑峻法，诸部人多以违命得罪。凡后期者皆举部戮之，或有室家相携，悉赴死所，人问何之，曰当就诛。其威严若此。

九年，帝召六年修不至，怒，讨之失利，遂崩。

普根先守外境，闻难，来攻六修灭之。普根立月余薨。普根子始生，桓帝后立之，又薨，思帝子平文皇帝立。

平文皇帝讳郁律。姿质雄壮，甚有威略。元年，岁在丁丑。二年，刘武据朔方，来侵西部，帝大破之。西兼乌孙故地，东吞勿吉以西，控弦上马将百万。

是岁，晋元帝即位于江南，刘曜僭帝位。帝闻晋愍帝为曜所害，顾谓大臣曰：“今中原无主，天其资我乎？”曜遣使请和，帝不纳。

三年，石勒自称赵王，遣使乞和，请为兄弟，帝斩其使以绝之。五年，晋元帝遣使韩畅加崇爵服，帝绝之。讲武，有平南夏志。桓帝后以帝得众心，恐不利己子，害帝，遂崩，大人死者数十人。天兴初，追尊曰太祖。

桓帝中子惠帝贺薄立，以五年为元年。帝未亲政事，太后临朝，遣使与石勒通和，时人谓之女国使。四年，帝始临朝，以诸部人情未悉款顺，乃筑城于东木根山，徙都之。五年，帝崩。

弟炀帝乞那立，以五年为元年。三年，石勒遣石季龙寇边部，帝御之，不利，迁于大宁。

时平文帝长子烈帝居于舅贺兰部，帝遣使求之，贺兰部帅蒿头拥护不遣。帝怒，召宇文部并力击蒿头。宇文众败，帝还大宁。五年，帝出居于宇文部，贺兰及诸部大人共立烈帝。

烈皇帝讳翳槐，以五年为元年。石勒遣使求和，帝遣弟昭成帝如襄国，徙者五千余家。七年，蒿头不修臣职，召而戮之，国人复二。于是炀帝自宇文部还入，诸部大人复奉之。

炀帝以烈帝七年为后元年。时烈帝出居于郅。三年，石季龙纳烈帝于大宁。国人六千余家部落叛，炀帝出居于慕容部。

烈帝复立，以炀帝三年为后元年。城盛乐城，在故城东南十里。一年而崩，弟昭成皇帝立。

昭成皇帝讳什翼犍，平文皇帝之次子也。生而奇伟，宽仁大度，身長八尺，隆准龙颜，立发委地，卧则乳垂至席。烈帝临崩，顾命迎帝，曰：“立此人则社稷乃安。”故帝弟孤自诣郅奉迎，与帝俱还。

建国元年十一月，帝即位于繁峙北，时年十九。

二年春，始置百官，分掌众职。东自灭貊，西及破落那，莫不款附。五月，朝诸大人于参合陂，议定都涇源川，连日不决，乃从太后计而止。娉慕容晃妹为皇后。

三年春，移都云中之盛乐宫。

四年，筑盛乐城于故城南八里。皇后慕容氏崩。十月，刘武寇西境，帝遣军大破之。武死，子务桓立，始来归顺，帝以女妻之。

七年二月，遣大人长孙秩迎后慕容氏于和龙，晃送女于境。七月，慕容晃遣使来聘，求交婚，帝许之，以烈帝女妻焉。

十四年，帝以中州纷梗，将亲率六军，乘石氏之乱，廓定中原，诸大人谏，乃止。

十八年，太后王氏崩。

十九年正月，刘务桓死，其弟阏头立，潜谋反。

二十一年，阏头部人多叛，俱而东走，度河半济而冰陷。后众尽归其兄于悉勿祈。初，阏头之叛，悉勿祈兄弟十二人在帝左右，尽遣之归，欲其自相猜离。至是，悉勿祈夺其众，阏头穷而归命，帝待之如初。

二十二年春，帝东巡桑乾川。四月，悉勿祈死，弟卫辰立。

二十三年六月，皇后慕容氏崩。七月，卫辰来会葬，因求婚，许之。

二十五年，帝南巡君子津。

二十八年正月，卫辰谋反，度河东，帝讨之，卫辰惧，遁走。

三十年十月，帝征卫辰。时河冰未成，帝乃以苇绳约渐，俄然冰合，乃散苇于上，冰草相结若浮桥，众军利涉。卫辰与宗族西走，收其部落而还。

三十四年春，长孙斤谋反，伏诛。斤之反也，拔刃向御坐，太子寔格之，伤肋，五月薨，后追谥焉，是为献明皇帝。七月，皇孙珪生，大赦。

三十九年，苻坚遣其大司马苻洛帅众二十万及其将朱彤、张蚝、邓羌等诸道来寇，王师不利。帝时不豫，乃率国人避于阴山之北。高车杂种尽叛，四面寇抄，不得畜牧，复度漠南。坚军稍退，乃还。十二月，至云中。旬有二日，皇子寔君作乱，帝暴崩，时年五十七。道武帝即位，尊曰高祖。

帝性宽厚。时国少缯帛，代人许谦盗绢二匹，守者以告，帝匿之，谓燕凤曰：“吾不忍视谦之面，卿勿泄之，谦或惭而自杀，为财辱士，非也。”帝尝击西部叛贼，流矢中目。贼破后，诸大臣执射者，各持椎刀欲屠割之。帝曰：“各为其主，何罪也，释之。”其仁恕若此。

太祖道武帝讳珪，昭成皇帝之嫡孙，献明帝之子也。母曰献明贺皇后，初因迁徙，游于云泽，寝，梦日出室内，寤而见光自牖属天，杳然有感，以建国三十四年七月七日生帝于参合陂北，其夜复有光明。昭成大悦，群臣称庆，大赦，告于祖宗。保者以帝体重倍于常儿，窃独奇怪。明年有榆生于戴胞之坎，后遂成林。帝弱而能言，目有光曜，广颡大耳。六岁而昭成崩，苻坚遣将内侮，将迁帝长安，赖燕凤乃免。坚军既还，国众离散，坚使刘库仁、刘卫辰分摄国事。南部大人长孙嵩及元他等尽将故人众南依库仁，帝于是转在独孤部。

元年，葬昭成皇帝于金陵，营梓宫木尽生成林。帝虽冲幼，而巍然不群。刘库仁常谓其子曰：“帝有高天下之志，必兴复洪业。”

七年十月，晋败苻坚于淮南。慕容文等杀刘库仁，弟眷代摄国部。

八年，慕容暄弟冲僭立。姚萇自称大单于、万年秦王。慕容垂僭称燕王。

九年，刘库仁子显杀眷而代，乃将谋逆，商人王霸知之，履帝足于众中，帝乃驰还。是时，故大人梁盆子六眷为显谋主，尽知其计，密使部人穆崇驰告。帝乃阴结旧臣长孙健、元他等，因幸贺兰部。其日，显果使人杀帝，不及，语在《献明太后传》。

是岁，乞伏国仁私署秦、河二州牧、大单于。姚萇杀苻坚，坚子丕僭即皇帝位于晋阳。

登国元年春正月戊申，帝即代王位，郊天建元，大会于牛川。复以长孙嵩为南部大人，以叔孙普洛为北部大人。是月，慕容垂僭即皇帝位于中山，国号燕。二月，幸定襄之盛乐，息众课农。慕容冲为其部下所杀。

夏四月，改称魏王。五月，姚弋仲即皇帝位于长安，国号大秦。

秋八月，刘显遣弟允泥迎皇叔父窟咄于慕容永，以兵随之，来逼南境。帝左右于桓等与诸部大人谋应之，事泄，诛造谋者五人，余悉不问。帝虑内难，乃北逾阴山，幸贺兰部，阻山为固。遣行人安同、长孙贺征师于慕容垂，垂令其子贺麟率师随同等。军未至而寇逼，于是北部大人叔孙普洛等十三人及诸乌丸亡奔卫辰。帝自弩山幸牛川，屯于延水，南出代谷，会贺麟于高柳，大破窟咄，悉收其众。

冬十月，苻丕为晋将冯该所杀。慕容永僭即皇帝位于长子。十一月，苻登僭即皇帝位于陇东。十二月，慕容垂遣使奉帝西单于印绶，封上谷王，帝不纳。

二年夏五月，遣安同征兵于慕容垂，垂遣子贺麟率众来会。六月，帝亲征刘显，显奔慕容永，尽收其部落。

冬十二月，巡松漠，还幸牛川。

三年夏五月癸亥，北征库莫奚，大破之。六月，乞伏国仁死，其弟乾归立，私署河南王。

秋七月，库莫奚部帅鸠集遁散，夜犯行宫，纵骑扑讨，尽灭之。

八月，使九原公仪于慕容垂。冬十月，垂遣使朝贡。

四年春正月甲寅，袭高车诸部落。二月癸巳，遂至女水，讨叱突邻部。并大破之。是月，吕光自称三河王。

夏五月，使陈留公虔于慕容垂。冬十月，垂遣使朝贡。

五年春三月甲申，西征，次鹿浑海，袭高车袁纥部，大破之。慕容垂遣子贺麟来会。夏四月丙寅，行幸意辛山，与贺麟讨贺兰、纥奚诸部落，大破之。

秋八月，还幸牛川。使秦王觚于慕容垂。九月壬申，讨叱奴部囊曲水，破之。

冬十月，讨高车豆陈部于狼山，破之。十二月，帝还次白漠。

六年春正月，幸纽垵川。三月，遣九原公仪、陈留公虔等西讨黠弗部，大破之。

夏四月，祭天。

秋七月壬申，讲武于牛川。慕容垂止秦王觚而求名马，帝绝之。乃遣使于慕容永，永使其大鸿胪慕容钧奉表劝进尊号。九月，帝袭五原，屠之，收其积谷。还纽垵川，于橐阳塞北树碑记功。

冬十月戊戌，北征蠕蠕，追破之于大碛南商山下。十一月戊辰，还幸纽垵川。戊寅，卫辰遣子直力鞬寇南部。壬午，帝大破之于铁歧山南，卫辰父子奔遁。十二月，灭之，卫辰少子屈丐亡奔薛干部。自河以南，诸部悉平。收卫辰子弟宗党无少长五千余人，尽杀之。

是岁，起河南宫。

七年春正月，幸木根山，遂次黑盐池，猎群臣，北之美水。三月，还幸河南宫。

秋七月，行幸漠南，仍筑巡台。

冬十二月，慕容永遣使朝贡。

八年春正月，南巡。二月，幸段羊原，赴白楼。

夏六月，北巡。秋七月，临幸新坛。

先是卫辰子屈丐奔薛干部，征之不迭，八月，帝南征薛干部，屠其城。九月，还幸河南宫。

九年春三月，北巡。使东平公元仪屯田于河北五原，至于橐阳塞外。夏五月，田于河东。秋七月，还幸河南宫。

冬十月，蠕蠕社仑等率部落西走。

是岁，姚长子兴僭立，杀苻登。慕容垂灭永。

十年秋七月，慕容垂遣其子宝来寇五原。八月，帝亲兵于河南。冬十月辛未，宝烧船夜遁。十一月己卯，帝进军济河，乙酉夕，至参合陂。丙戌，大破之，离其王公以下文武吏数千人。于俘虏中擢其才识者贾彝、贾闰、晁崇等参谋议，亮章故实。

十二月，还幸云中之盛乐。

皇始元年春正月，大搜子定襄，因东幸善无北陂。三月，慕容垂寇桑乾川，陈留公虔死之。垂遂至平城西北，闻帝将至，乃筑城自守，疾甚，遂遁，死于上谷。子宝秘丧，还至中山，乃僭立。

夏六月丁亥，皇太后贺氏崩。是月，葬献明太后。吕光僭称天王。国号凉。

秋七月，左司马许谦上书劝进尊号，于是改元，始建天子旌旗，出警入蹕。

八月己亥，大举讨慕容宝。帝亲勒六军四十余万南出马邑，逾句注，旌旗络绎二千余里，鼓行而前，人屋皆震。别诏将军封真等从东道袭幽州，围蓟。九月戊午，次阳曲，乘西山，临观晋阳。宝并州牧、辽西王农弃城遁，并州平。

初建台省，置百官，封拜公、侯、将军、刺史、太守，尚书郎以下悉用文人。帝初拓中原，留心慰纳，诸士大夫诣军门者，无少长皆引入，人得尽言，苟有微能，咸蒙叙用。己未，诏辅国将军奚牧略地晋川，获慕容宝丹杨王买得等于平陶城。九月，晋孝武帝殂。

冬十一月庚子朔，帝至真定，自常山以东，守宰或捐城奔窜，或稽颡军门，唯中山、邺、信都三城不下。别诏东平公仪攻邺，冠军将军王建、左军将军李栗等攻信都，军所行不得伤桑枣。戊午，进军中山。己未，围之。帝曰：“朕量宝不能出战，必凭城自守，急攻则伤士，久守则费粮，不如先平邺、信都，然后还取中山。”诸将称善。丁卯，车驾幸鲁口城。

二年春正月壬戌，帝引骑围信都。其夜，宝冀州刺史、宜都王慕容凤逾城奔中山。癸亥，宝辅国将军张骥、护军将军徐超举城降。是月，鲜卑秃发乌孤私署大单于、西平王。

二月丁丑，帝军于巨鹿之柏肆坞，临漳沱水。其夜，宝悉众犯营，燎及行宫，兵人骇散。帝惊起，不及衣冠，跳出击鼓。俄而左右及中军将士稍集。帝设奇阵，列烽营外，纵骑卫之。宝众大败，走还中山，获其器械数十万计。宝尚书阎亮、秘书监崔暹等降者相属，赐拜职爵各有差。三月己酉，车驾次卢奴。宝求和，请送秦王觚，割常山以西奉魏，乞守中山以东。帝许之。己而宝背约。辛亥，车驾次中山，命将围之。是夜，宝弟贺麟将妻子走西山。宝恐贺麟先据和龙，壬子夜，北遁。城内共立慕容普邻为主。

夏四月，帝以军粮不继，诏东平公仪罢郢南徙，徙屯巨鹿。五月庚子，帝以中山城内为普邻所胁，乃招喻之。甲辰，噉兵扬威，以示城内，命诸军罢围南徙，以待其变。甲寅，以东平公仪为左丞相，封卫王。进襄城公题爵为王。

秋七月，普邻遣乌丸九张骊率五千余人出城求食，寇灵寿。贺麟自丁零中入骊军，因其众，复入中山，杀普邻而自立。八月丙寅朔，帝进军九门。时大疫，人马牛死者十五六，中山犹拒守，群下咸思北还。帝知之，谓曰：“斯固天命，将若之何！四海之人皆可与为国，在吾所以抚之耳，何恤乎无人！”群臣乃不敢言。九月，贺麟饥穷，率三万余人寇新市。甲子晦，帝进军讨之。太史令晁崇奏曰：“不吉。”帝曰：“何也？”对曰：“紂以甲子亡，兵家忌之。”帝曰：“周武不以甲子胜乎？”崇无以对。

冬十月丙寅，帝进军新市，贺麟退阻泝水，依渐洳泽以自固。甲戌，帝临其营，战于义台坞，大破之。贺麟单马走郢，慕容德杀之。甲申，贺麟所署公卿尚书将吏士卒降者二万余人。其将张骊、李沈、慕容文等先来降，寻皆亡还，是日复获之，皆赦而不问。获其所传皇帝玺绶、图书、府库珍宝。中山平。乙酉，襄城王题薨。

天兴元年春正月，慕容德走保滑台，卫王仪克郢。庚子，行幸真定，遂幸郢。百姓有老病不能自存者，诏郡县振恤之。帝至郢，巡登台榭，遍览宫城，将有定都之志，乃置行台。遂还中山，所过存问百姓。诏大军所经州郡皆复赆租一年，除山东人租赋之半。车驾将北还，发卒万人通直道，自望都铁关凿恒岭至代五百余里。帝虑还后山东有变，乃于中山置行台，诏卫王仪镇之，使略阳公遵镇勃海之合口。右军将军尹国先督租于冀州，闻帝将还，谋反，欲袭信都，安南将军长孙嵩执送，斩之。辛酉，车驾发中山，至于望都尧山。徙山东六州人吏及徙何、高丽杂夷、三十六署百工伎巧十余万口以充京师。车驾次于恒山之阳。博陵、勃海、章武诸郡群盗并起，略阳公遵等讨之。是月，慕容德自称燕王，据广固。

二月，车驾至自中山。幸繁峙宫。更选屯卫。诏给内徙新户耕牛，计口受田。三月，征左丞相、卫王仪还京师，诏略阳公遵代镇中山。

夏四月壬戌，以历阳公穆崇为太尉，巨鹿公长孙嵩为司徒，进封略阳公遵为常山王，南安公顺为毗陵王。祭天于西郊，旗帜有加焉。广平太守、辽西公意列谋反，与郡人韩奇矫假璽图，将袭郢城。诏反者就郡赐死。是月，兰汗杀慕容宝而自立为大单于、昌黎王。

六月丙子，诏有司议定国号。群臣奏曰：“昔周、秦以前，帝王居所生之土，及王天下，即承为号。今国家启基云、代，应以代号为。”诏曰：“昔朕远祖总御幽都，控制遐国，虽践王位，未定九州。逮于朕躬，扫平中土，凶逆荡除，遐迹率服，宜仍先号为魏。”

秋七月，迁都平城，始营宫室，建宗庙，立社稷。慕容宝子盛杀兰汗而自立为长乐王。八月，诏有司正封畿，制郊甸，端径术，标道里，平五权，较五量，定五度。遣使循行郡国，举奏守宰不法者，亲览察黜陟之。

冬十月，起天文殿。十一月辛亥，尚书吏部郎中邓彦海典官制，立爵品，定律吕，协音乐；仪曹郎中董谧撰郊庙、社稷、朝觐、飨宴之仪；三公郎中王德定律令，申科禁；太史令晁崇造浑仪，考天象；吏部尚书崔宏总裁之。

闰下，左丞相卫王仪及王公卿士诣阙上书曰：“臣等闻宸极居中，则列宿齐其晷；帝王顺天，则群后仰其度。伏惟陛下德协二仪，道隆三五，仁风被于四海，盛化塞于天区，泽及昆虫，恩沾行苇，讴歌所属，八表归心；而躬履谦虚，退身后已，宸仪未彰，亮服未御，非所以上允皇天之意，下副乐推之心。臣等谨昧死以闻。”帝三让乃许之。

十二月己丑，帝临天文殿，太尉、司徒进玺绶，百官咸称万岁。大赦，改元，追尊成帝以下及后号谥，乐用《皇始之舞》。诏百司议定行次，尚书崔宏等奏从土德，服色尚黄，数用五，祖以未，腊以辰，牺牲用白，五郊立气，宣赞时令，敬授人时，行夏之正。徙六州二十二郡守宰豪杰吏人二千家于代郡。

二年春正月甲子，初祀上帝于南郊，以始祖神元皇帝配，降坛视燎，成礼而反。乙丑，赦京兆。始制三驾之法。庚午，北巡。分命诸将大袭高车，常山王遵三军从东道出长川，高凉王乐真等七军从西道出牛川，车驾亲勒六军从中道自鞍鞮水西北出。二月丁亥朔，诸军同会，破高车杂种三十余部。卫王仪督三将别从西北绝漠千余里，破其遗进七部。还次牛川，及薄山，并刻石纪功。以所获高车众起鹿苑于南台阴，北距长城，东苞白登，属之西山，广轮数十里。凿渠引武川水，注之苑中，疏为三沟，分流宫城内外。又穿鸿雁池。三月己未，车驾至自北伐。甲子，初令《五经》群书各置博士，增国子太学生员三千人。是月，氐人李辩叛慕容德，求援于郢。行台尚书和跋以轻骑应之，克滑台，收德宫人府藏。

秋七月，起天华殿。辛酉，大阅于鹿苑。八月，增启京城十二门，作西武库。除州郡人租赋之半。辛亥，诏礼官备撰众仪，著于新令。范阳人卢溥聚众海滨，称幽州刺史，攻掠郡县，杀幽州刺史封沓干。

是月，秃发乌孤死，其弟利鹿孤立，遣使朝贡。

冬十月，太庙成，迁神元、平文、昭成、献明皇帝神主于太庙。十二月，天华殿成。吕光立其子绍为天王，自称太上皇，及死，庶子纂杀绍而僭立。

三年春正月戊午，材官将军和跋破卢溥于辽西，获之，及其子焕传送京师，轶之。癸亥，祀北郊。分命诸官循行州郡，观风俗，察举不法。二月丁亥，诏有司祀日于东郊。始耕籍田。壬寅，皇子聪薨。三月戊午，立皇后慕容氏。是月，穿城南渠通于城内，作东西鱼池。

夏四月，姚兴遣使朝贡。五月戊辰，诏谒者仆射张济使于兴。己巳，东巡，遂幸涿鹿，遣使者以太牢祀帝尧、帝舜庙。西幸马邑，观渔源。六月庚辰朔，日有蚀之。

秋七月，乞伏乾归大为姚兴所破。壬子，车驾还宫。起中天殿及云母堂、金华室。

时太史奏天文错乱，帝亲览经占，多云宜改王易政，于是数革官号，欲以防塞凶狡，消弥灾变。已而虑臣下疑惑，冬十二月丙申，下诏述成败之理，鉴殷、周之失，革秦、汉之弊，以喻臣下。

是岁，河右诸郡奉凉武昭王李玄盛为秦凉二州牧、凉公，纂兴霸业，年号庚子。

四年春二月丁亥，命乐师入学习舞，释菜于先圣、先师。丁酉，分命使者巡行州郡，听察辞讼，纠劾不法。是月，目光弟子隆献吕纂而自立。三月，帝亲渔，荐于寝庙。

夏四月辛卯，罢郢行台。诏有司明扬隐逸。五月，起紫极殿、玄武楼、凉风观、石池、鹿苑台。六月，卢水胡沮渠蒙逊私署凉州牧、张掖公。

秋七月，诏兖州刺史长孙肥南徇许昌、彭城。诏赐天下镇戍将士布帛各有差。八月，段兴杀慕容盛，叔父熙尽诛段氏，僭即皇帝位。

冬十二月，集博士儒生比众经文字，义类相从，凡四万余字，号曰《众文经》。

是岁，凉武昭王沮渠蒙逊遣使朝贡。

五年春正月，帝闻姚兴将寇边，庚寅，大简輿徒，诏并州诸军积谷于平阳乾壁。

三月，秃发利鹿孤死。

夏五月，姚兴遣其弟义阳公平来侵平阳，攻陷乾壁。秋七月戊辰朔，车驾西讨。八月乙巳，至柴壁，平固守，进军围之，姚兴悉举其众来救。甲子，帝度蒙坑，逆击兴军大破之。冬十月，平赴水而死，俘其余众三万余人，获兴尚书左仆射狄伯支以下四品将军以上四十余人。获前亡臣王次多、靳勒，并斩以徇。兴频使请和，帝不许。群臣请进平蒲坂，帝虑蠕蠕为难，戊申，班师。

十一月，车驾次晋阳。征相州刺史庾岳为司空。十二月辛亥，至自西征。越勒莫弗率其部万余家内属。

六年春正月辛未，朔方尉迟部别帅率万家内属，入居云中。

夏四月癸巳朔，日有蚀之。五月，大简輿徒，将略江淮。

秋七月，镇西大将军、司隶校尉、毗陵王顺有罪，以王还第。戊子，北巡，筑离宫于豺山，纵士校猎，东北逾厩岭，出参合、代谷。九月，行幸南平城，规度淮南夏屋山，背黄瓜堆，将建新邑。辛未，车驾还宫。

冬十月，起西阳昭殿。乙卯，立皇子嗣为齐王，加车骑大将军，位相国；绍为清河王，加征南大将军；熙为阳平王，曜为河南王。封故秦穆王子褒为豫章王，陈留桓王子悦为朱提王。丁巳，晋人来聘。十一月庚午，将军伊谓大破高车。十二月，晋桓玄废其主司马德宗为平固王而自立，僭号楚。

天赐元年春二月，晋刘裕起兵诛桓玄。三月，初限县户不满百罢之。

夏五月，置山东诸治，发州郡徒谪造兵甲。

秋九月，帝临昭阳殿，分置众职，引朝臣文武亲自简擢，量能叙用；制爵四等，曰王、公、侯、子，除伯、男之号；追录旧臣，加封爵各有差。

是秋，江南大乱，流人襁负奔淮北者行道相寻。

冬十月辛巳，大赦，改元。筑西宫。十一月，幸西宫，大选臣僚，令各辨宗党，保举才行，诸部子孙失业赐爵者二千余人。

二年春正月，晋主司马德宗复位。

夏四月，祀西郊，车旗尽黑。

冬十月，慕容德死。

三年春正月甲申，北巡，幸豺山宫，校猎，还至屋孤山。二月乙亥，幸代园山，建五石亭。三月庚子，车驾还宫。

夏四月庚申，复幸豺山宫。占授著作郎王宜弟造《兵法孤虚立成图》三百六十时。遂登定襄角史山，又幸马城。甲戌，车驾还宫。六月，发八部五百里内男丁筑湟南宫，门阙高十余丈；引沟穿池，广苑囿；规立外城方二十里，分置市里，经途迤达。三十日罢。

秋七月，太尉穆崇薨。八月甲辰，行幸豺山宫，遂至青牛山。丙辰，西登武要北原，观九十九泉，造石亭，遂之石漠。九月甲戌朔，幸漠南盐池。壬午，至漠中，观天盐池。度漠北，之吐盐池。癸巳，南还长川。丙申，临观长坡。

冬十月庚申，车驾还宫。

四年春二月，封皇子修为河间王，处文为长乐王，连为广平王，黎为京兆王。

夏五月，北巡，自参合陂东过蠕羊山，大雨，暴水流輜车数百乘，杀百余人。遂东北逾石漠，至长川，幸濡源。常山王遵有罪赐死。六月，赫连屈丐自称大单于、大夏天王。

秋七月，西幸参合陂。筑北宫垣，三旬而罢，乃还宫。慕容宝养子高云杀慕容熙而自立，僭号天王。八月，诛司空庾岳。

五年春正月。行幸豺山宫，遂如参合陂，观渔于延水，至宁川。三月，姚兴遣使朝贡。

秋七月戊戌朔，日有蚀之。

冬十月，秃发傉檀僭即凉王位。

六年夏，帝不豫。初，帝服寒食散，自太医令阴羌死后，药数动发，至此愈甚。而灾变屡见，忧懣不安，或数日不食，或不寝达旦，归咎群下，喜怒乖常。谓百僚左右不可信，虑如天文之占，或有肘腋之虞。追思既往成败得失，终日竟夜独语不止，若傍有鬼物对扬者。朝臣至前，追其旧恶，便见杀害；其余或以颜色变动，或以喘息不调，或以行步乖节，或以言辞失措，帝以为怀恶在心，变见于外，乃手自殴击。死者皆陈天安殿前。于是朝野人情各怀危惧，有司废息，莫相督摄，百工偷劫，盗贼公行，巷里之间，人为稀少。帝亦闻之，曰：“朕故纵之使然，幸过灾年，当更清整之耳。”

秋七月，慕容氏支属百余家谋欲外奔，发觉，伏诛死者三百余人。八月，卫王仪谋叛，赐死。

十月戊辰，清河王绍作乱，帝崩于天安殿，时年三十九。永兴二年九月甲寅，上谥曰宣武皇帝，葬于盛乐金陵，庙号太祖，泰常五年改谥曰道武。

太宗明元皇帝讳嗣，道武皇帝之长子也，母曰刘贵人，登国七年，生于云中宫。道武晚有男，闻而大悦，乃大赦。帝明睿宽毅，非礼不动。天兴六年，封齐王，拜相国。初，帝母既赐死，道武召帝告曰：“昔汉武将立其子而杀其母，不令妇人与国政，汝当继统，故吾远同汉武。”帝素纯孝，哀不自胜。道武怒。帝还宫，哀不自止，道武知而又召帝。帝欲入，左右谏，请待和解而进，帝从之。及元绍之逆，帝还而诛之。

永兴元年冬十月壬午，皇帝即位，大赦改元，追尊皇妣为宣穆皇后。公卿大臣先罢归第者，悉复登用之。诏南平公长孙嵩、北新侯安同对理人讼，简贤任能。是月，冯跋弑其主高云，僭号天王，国号北燕。

闰十月丁亥，朱提王悦谋反，赐死。诏郑兵将军山阳侯奚斤巡诸州，向人疾苦。十二月戊戌，封卫王仪子良为南阳王，进阴平公烈爵为王，改封高凉王乐真为平阳王。己亥，帝始居西宫，御天文殿。蠕蠕犯塞。

是岁，乞伏乾归自称秦王。

二年春正月甲寅朔，诏南平公长孙嵩等北征蠕蠕，因留屯漠南。夏五月，嵩等自大漠还，蠕蠕追围之于牛川。壬申，帝北伐，蠕蠕闻而遁走。车驾还幸参合陂。

六月，晋将刘裕灭慕容超。

秋七月丁巳，立射台于陂西，仍讲武。乙丑，至自北伐。

三年春二月戊戌，诏简官人非御及伎巧者，悉以赐鰥人。己亥，诏北新侯安同等持节巡行并、定二州及诸山居杂胡、丁零，问其疾苦，察举守宰不法者。辛丑，简官人工伎之不急者出，赐人不能自存者。三月己未，诏侍臣常佩剑。

夏五月丙寅，复出官人赐鰥人。丁卯，车驾谒金陵于盛乐。己巳，昌黎王慕容伯儿谋反，伏诛。六月，姚兴遣使朝贡。

秋七月戊申，赐卫士酺三日。

冬十一月丁未，大阅于东郊。

四年春二月癸未，登兽圈，射猛兽。

夏四月乙未，宴群臣于西宫，使各献直言，勿有所讳。六月，乞伏乾归为兄子公府所弑。闰月丙辰，大阅于东郊。

秋七月己巳朔，东巡。置四厢大将，又放十二时，置十二小将。以山阳侯奚斤、元城公屈行左右丞相。己卯，大狩于石会山。戊子，临去畿陂观渔。庚寅，至于濡源，西巡，幸北部诸部落。八月壬子，幸西宫，临板殿，大飨群臣，命百姓大酺三日。乙卯，赐王公以下至宿卫将士布各有差。

冬十一月己丑，赐宗室近属南阳王良以下至于缙麻亲布帛各有差。是月，沮渠蒙逊僭称河西王。十二月丁巳，北巡，至长城而旋。

五年春正月己巳，大阅畿内，男年十二以上悉集。己卯，幸西宫。额拔大渠帅四十余人诣阙奉贡，赐以缙帛锦罽各有差。乙酉，诏诸州，六十户出戎马一匹。庚寅，大阅于东郊，署将帅，以山阳侯奚斤为前军，众三万；阳平王熙等十二将各一万骑；帝临白登，躬自校阅。二月庚戌，幸高柳川。癸丑，穿鱼池于北苑。庚午，姚兴遣使朝贡。己卯，诏使者巡行天下，招延俊彦，搜扬隐逸。

夏四月乙卯，西巡。五月乙亥，行幸云中旧宫之大室。丙子，大赦。六月，西幸五原，校猎于骨罗山，获兽十万。

秋七月己巳，还幸薄山。帝登观宣武游幸刻石颂德之处，乃于其旁起石坛而荐飧焉，赐从者大酺于山下。前军奚斤等破越勒倍泥部落于跋那山西，徙二万余家而旋。丙戌，车驾自大室西南巡诸部落，遂南次定襄大洛城，东逾七岭山，田于善无川。八月癸卯，车驾还宫。癸丑，奚斤等班师。甲寅，帝临白登山，观降人，数军实。置新入于大宁，给农器，计口受田。

冬十一月癸酉，大飨于西宫。姚兴遣使朝贡，请进女，帝许之。

神瑞元年春正月辛酉，以神瑞频集，大赦改元。辛巳，行幸繁峙。赐王公以下至于士卒百工布帛各有差。二月戊戌，车驾还宫。乙卯，起丰宫于平城东北。

夏六月，乞伏焘盘灭秃发晃檀。

秋七月，晋将朱龄石灭蜀。八月戊子，诏马邑侯元嗣孙使于姚兴。姚兴遣使朝贡。九月丁巳朔，日有蚀之。

冬十一月壬午，诏使者巡行诸州，校阅守宰资财，非自家所资，悉簿为贓。守宰不如法，听百姓诣阙告之。十二月丙戌朔，蠕蠕犯塞。丙申，车驾北伐。

二年春正月丙辰，车驾至自北伐。二月丁亥，大飨于西宫。甲辰，立宣武庙于白登西。三月丁丑，诏以刺史守宰率多通情，今年贷调县道者，滴出家财以充，不听征发于人。

夏四月，晋人来聘。己卯，北巡。五月丁亥，次于参合，东幸大宁。丁未，田于四岬山。六月戊午，临去畿陂观渔。辛酉，次于濡源，立射台。遂射白熊于赧牛山，获之。丁卯，幸赤城，亲见长老，问人疾苦，复租一年。南次石亭，幸上谷，问百年，访贤俊，复田租之半。壬申，幸涿鹿，登岬山，观温泉，使以太牢祠黄帝、唐尧庙。癸酉，幸广宁，事如上谷。己卯，登广宁之历山，以太牢祠舜庙，帝亲加礼焉。庚辰，幸代。

秋七月癸未，车驾还宫，复所过田租之半。八月庚辰晦，日有蚀之。九月，京师人饥，听就食山东。

冬十月壬子，姚兴使奉其西平公主至，帝以后礼纳之。辛酉，行幸沮洳城。癸亥，车驾还宫。丙寅，诏以频遇霜旱，年谷不登，命出布帛仓谷以振贫穷。

泰常元年春二月丁未，姚兴死。三月己丑，长乐王处文薨。

夏四月壬子，大赦改元。庚申，河间王修薨。五月甲申，慧星二见。六月丁巳，北巡。

秋七月甲申，大狩于牛川，登釜山，临殷繁水，南观于九十九泉。戊戌，车驾还宫。辛亥晦，日有蚀之。

九月，晋刘裕溯河伐姚泓，遣部将王仲德从陆道至梁城。兖州刺史尉建畏懦，弃守北渡，仲德遂入滑台。诏将军叔孙建等度河曜威，斩尉建于城下。

冬十一月戊寅，起蓬台于北苑。十二月，南阳王良薨。

二年春正月甲戌朔，日有蚀之。二月丙午，诏使者巡行天下，观风俗，问其所苦。是月，凉武昭王薨。五月，西巡至云中，遂济河，田于大漠。

秋七月乙亥，车驾还宫。乙酉，起白台于城南，高二十丈。是月，晋刘裕灭姚泓。

冬十月癸丑，豫章王夔薨。十二月己酉，诏河东、河内购泓子弟播越人间者。

三年春三月，晋人来聘。庚戌，幸西宫。以勃海、范阳郡去年水，复其租税。

夏四月己巳，徙冀、定、幽三州徙何于京师。五月壬子，东巡至濡源，及甘松。遣征东将军长孙道生帅师袭冯跋，遂至龙城，徙其居人万余家而还。

秋七月戊午，车驾至京师。八月，雁门、河内大雨水，复其租税。

冬十月戊辰，筑宫于西苑。十一月，赫连屈丐克长安。十二月，晋安帝殂。

四年春正月壬辰朔，车驾临河，大搜于棣渚。癸卯，还宫。

三月，赫连屈丐僭即皇帝位。癸丑，筑宫于蓬台北。

夏四月庚辰，享东庙，远蕃助祭者数百国。辛巳，南巡，幸雁门，赐所过无出今年租赋。五月庚寅朔，观渔于滹水。己亥，车驾还宫。

秋八月辛未，东巡，遣使祠恒岳。甲申，车驾还宫，赐所过无出今年田租。九月甲寅，筑宫于白登山。

冬十一月丁亥朔，日有蚀之。十二月癸亥，西巡，至云中，逾白道，北猎野马于辱孤山，至于黄河，从君子津西度，大狩于薛林山。

五年春正月丙戌朔，自薛林东还，至屋窰城，犒劳将士，大酺二日，班禽以赐之。己亥，车驾还宫。三月丙戌，南阳王意文薨。

夏四月丙寅，起淮南宫。五月乙酉，诏曰：“宣武皇帝体得一之玄远，应自然之冲妙，大行大名，未尽盛美。今启纬图，始观尊号，其更上尊谥曰道武皇帝，以章灵命之先启，圣德之玄同。”庚戌，淮南侯司马国璠、池阳侯司马道赐等谋反，伏诛。六月丙寅，幸霸陵山。是月，晋恭帝禅位于宋。

秋七月丁酉，西至五原。丁未，幸云中大室，赐从者大酺。八月癸亥，车驾还宫。闰月甲午，阴平王烈薨。

是岁，西凉亡。

六年春二月己亥，诏天下户二十输戎马一匹、大牛一头。三月甲子，阴平王熙薨。乙亥，制六部人羊满百口者调戎马一匹。发京师六千余人筑苑，起自旧苑，东苞白登，周回四十余里。

夏六月乙酉，北巡，至于蟠羊山。秋七月乙卯，车驾还宫。癸酉，西巡。猎于祚山，亲射猛兽，获之。遂至于河。八月庚子，大狩于棣渚。九月庚戌，车驾还宫。壬申，宋人来聘。

冬十月己亥，行幸代。十二月丙申，西巡于云中。

七年春正月甲辰朔，自云中西幸屋窰城，赐从者大酺三日。二月丙戌，车驾还宫。三月乙丑，河南王曜薨。

夏四月甲戌，封皇子焘为太平王，拜相国，加大将军；丕为乐平王，加车骑大将军；弥为安定王，加卫大将军；范为乐安王，加中军大将军；健为永昌王，加抚军大将军；崇为建宁王，加辅国大将军；俊为新兴王，加镇军大将军；献怀长公主嵇敬为长乐王，拜大司马、大将军。初，帝服寒食散，频年发动，不堪万机，五月，立太平王焘为皇太子，临朝听政。是月，宋武帝殒。

秋九月，诏司空奚斤等帅师伐宋。乙巳，幸淮南宫，遂如广宁。己酉，诏皇太子率百国以法驾田于东苑，车乘服物皆以乘舆之副。辛亥，筑平城外郭，周回三十二里。辛酉，幸岍山，遣使者祠黄帝、唐尧庙。因东幸幽州，见耆年，问其所苦，赐以爵号。分遣使者巡行州郡，观察风俗。

冬十月甲戌，车驾还宫，复所过田租之半。奚斤等济河，攻滑台不拔，求济师，帝怒不许。议亲南征，为其声援。壬辰，南巡，出自天门关，逾恒岭，四方蕃附大人各帅所部从者五万余人。十一月，皇太子亲统六军镇塞上，安定王弥与北新公安同居守。丙午，曲赦司州殊死以下。丙辰，次于中山，问人疾苦。十二月丙戌，行幸冀州，存问人俗。遣寿光侯叔建等率众自平原东度，徇下青、兖诸郡。

八年春正月丙辰，行幸鄴，存问人俗。司空奚斤既平兖、豫，还固武牢，宋守将毛德祖距守不下。蠕蠕犯塞。二月戊辰，筑长城于长川之南，起自赤城，西至五原，延袤二千余里，备置戍卫。三月乙卯，济自灵昌。

夏四月丁卯，幸成皋，观武牢。而城内乏水，县梗汲河。帝令连舰，上施辘轳，绝其汲路；又穿地道，以夺其井。丁丑，幸洛阳，观石经。闰月丁未，还幸河内，北登太行，幸高都。己未，武牢溃。士众大疫，死者十二三。辛酉，幸晋阳，班赐王公以下至于厮役。五月丙寅，还次雁门，皇太子率留台王公迎于句注之北。庚寅，车驾至自南巡。六月己亥，太尉、宜都公穆观薨。丙辰，北巡，至参合陂。

秋七月，幸三会屋侯泉，诏皇太子率百官以从。八月，幸马邑，观于滹源。九月乙亥，车驾还宫。

冬十月癸卯，广西宫，起外墙，周回二十里。是岁饥，诏所在开仓振给。

十一月己巳，帝崩于西宫，时年三十二。遗诏以司空奚斤所获军实赐大臣自司徒长孙嵩以下，至于士卒各有差。十二月庚子，上谥曰明元皇帝，葬于云中金陵，庙称太宗。

帝兼资文武，礼爱儒生，好览史传，以刘向所撰《新序》、《说苑》于经典正义多有所阙，乃撰《新集》三十篇，采诸经史，该洽古义云。

论曰：自古帝王之兴，诚有天命，亦赖累功积德，方契灵心。有魏奄宅幽方，代为君长。神元生自天女，桓、穆勤于晋室，冥符人事，夫岂徒然。

昭成以雄杰之姿，苞君人之量，征伐四克，威被遐荒，乃改都立号，恢隆大业，终百六十载，光宅区中，其原固有由矣。

道武显晦安危之中，屈申潜跃之际，驱率遗黎，奋其灵武，克荆方难，遂启中原，垂拱人神，显登皇极。虽冠履不暇，栖遑外土，而制作经谟，咸出长久，所谓大人利见，百姓与能，抑不世之神武也。而屯厄有期，祸生非虑，将人事不足，岂天实为之乎？

明元承运之初，属廓定之始，于时狼顾鸱峙，犹有窥觊，加以天赐之末，内难尤甚。帝孝心睿略，权正兼运，纂业固基，内和外抚，终能周、郑款服，声教南被，祖功宗德，其义良已远矣。

北史卷二

魏本纪第二

世祖太武皇帝讳焘，明元皇帝之长子也，母曰杜贵嫔。天赐五年，生于东宫。体貌环异，道武帝奇之曰：“成吾业者必此儿也。”泰常七年四月，封太平王，五月，立为皇太子，及明元帝疾，命帝统摄百揆。帝聪明大度，意豁如也。

八年十一月己巳，明元帝崩，壬申，太子即皇帝位，大赦天下。十二月，追尊皇妣为密皇太后，进司徒长孙嵩爵

为北平王，司空奚斤为宜城王，蓝田公长孙翰为平阳王，其余普增爵位各有差。于是除禁锢，释嫌疑，开仓库，振穷乏。河南流人相率内属者甚众。

始光元年春正月丙寅，安定王弼薨。

夏四月甲辰，东巡，幸大宁。六月，宋徐羨之弑其主义符。

秋七月，车驾还宫。

八月，蠕蠕六万骑入云中，杀略人吏，攻陷盛乐。帝帅轻骑讨之，虜乃退走。九月，大简輿徙于东郊，将北讨。

冬十二月，遣平阳王长孙翰等讨蠕蠕，车骑次柞山，蠕蠕北遁，诸军追之，大获而还。

二年春正月己卯，车驾至自北伐。三月丙辰，尊保母窦氏曰保太后。丁巳，以北平王长孙嵩为太尉，平阳王长孙翰为司徒，宜城王奚斤为司空。庚申，营故东宫为万寿宫，起永安安乐二殿、临望观、九华堂。初造新字千余。

夏四月诏龙骧将军步堆使宋。五月，诏天下十家发大牛一头运粟塞上。

秋八月，赫连屈丐死。九月，永安、安乐二殿成，丁卯，大猷以落之。

冬十月癸卯，车驾北伐，东西五道并出。平阳王长孙翰等绝漠追寇，蠕蠕北走。

三年春正月壬申，车驾至自北伐。乞伏炽盘遣使朝贡，请讨赫连昌。二月，起太学于城东，祀孔子，以颜回配。

夏五月辛卯，进中山公纂爵为王，复南安公素先爵常山王。六月，幸云中旧宫，谒陵庙，西至五原，田于阴山，东至和龙山。

秋七月，筑马射台于长川，帝亲登台走马。王公诸国君长驰射中者，赐金锦缯絮各有差。八月，车驾还宫。宋人来聘。

帝以赫连屈丐死，诸子相攻，冬十月丁巳，车驾西伐，幸云中，临君子津。会天暴寒，数日冰合。十一月戊寅，率轻骑袭赫连昌。壬午，徙万余家而还。至柞山，班虜获以赐将士各有差。十二月，诏奚斤西据长安。秦、陇氏羌皆叛昌诣斤降。武都王杨玄及沮渠蒙逊等使使内附。

四年春正月乙酉，车驾至自西伐，赐留台文武各有差。从人在道多死，到者载十六七。己亥，行幸幽州。赫连昌遣其弟定向长安。帝闻之，遣就阴山伐木造攻具。二月，车驾还宫。三月丙子，诏扶金吾桓贷造桥于君子津。丁丑，广平王连薨。

夏四月丁未，诏员外散骑常侍步堆使于宋。

五月，车驾西讨赫连昌，次拔邻山，筑城舍辎重，以轻骑三万先行。戊戌，至黑水。帝亲祈天，告祖宗之灵而誓众。六月癸卯朔，日有蚀之。甲辰，大破赫连昌，昌奔上邦。乙巳，车驾入城，虜昌群弟及其母妹妻妾官人万数，府库珍宝车旗器物不可胜计。辛酉，班师。留常山王素、扶金吾桓贷镇统万。

秋七月己卯，筑坛于柞岭，戏马驰射，赐中者金帛缯絮各有差。蠕蠕寇云中，闻破赫连昌，惧而逃。八月壬子，车驾至自西伐，饮至策勋，告宗庙，班军实以赐留台百僚各有差。

冬十一月，以氏王杨玄为假征南大将军、都督、梁州刺史、南秦王。十二月，行幸中山，守宰贪污免者十数人。癸卯，车驾还宫，复所过田租之半。

神䴥元年春正月，以天下守令多非法，精选忠良悉代之。辛未，京兆王黎薨。二月，改元。司空奚斤进军安定。监军侍御史安颉出战，禽昌。其余众立昌弟定为主，走还平凉。三月辛巳，侍中古弼送赫连昌至于京师。司空奚斤追赫连定于平凉马鬣岭，为定所禽。将军丘堆先在安定，闻斤败，东走长安。帝大怒，诏颉令斩之。

夏四月，赫连定遣使朝贡。壬子，西巡。戊午，田于河西，大赦。南秦王杨玄遣使朝贡。五月，乞伏炽盘死。

秋八月，东幸广宁，临观温泉。以大牢祭黄帝、尧、舜庙。九月，车驾还宫。

冬十一月乙未朔，日有蚀之。是月，行幸河西，大校猎。十二月甲申，车驾还宫。

二年夏四月，宋人来聘。庚寅，车驾北伐。五月丁未，次于沙漠，舍辎重，轻骑兼马至粟水，蠕蠕震怖，焚庐舍，绝迹西走。

冬十月，振旅凯旋于京师，告于宗庙。列置新人于漠南，东至濡源，西暨五原、阴山，竟三千里。十一月西巡，田于河西，至柞山而还。

三年春正月庚子，车驾还宫。壬寅，大赦。癸卯，行幸广宁，临温泉，作《温泉歌》。二月丁卯，司徒、平阳王长孙翰薨。戊辰，车驾还宫。三月壬寅，进会稽公赫连昌为秦王。

夏四月甲子，行幸云中。敕勒万余落叛走，诏尚书封铁追灭之。五月戊戌，论讨敕勒功，大明赏罚。

秋七月己亥，诏诸征镇将军、王公杖节边远者，听开府辟召，其次增置吏员。庚子，诏大鸿胪卿杜超假节都督冀定相三州诸军事、行征南大将军、太宰，进爵为王，镇邺，为诸军节度。

八月，宋将到彦之自清水入河，泝流西行。丙寅，彦之遣将度河攻冶坂，冠军将军安颉督诸军击破之。九月癸卯，立密皇后庙于邺。甲辰，行幸统万，遂征平凉。是月，冯跋死。

冬十月乙卯，冠军将军安颉济河攻洛阳，丙子，拔之。辛巳，安颉平武牢。

十一月乙酉，车驾至平凉。己亥，行幸安定。庚子，帝自安定还临平凉，遂掘堑固守之。行幸纽城，安慰初附，赦秦、陇之人，赐复七年。辛丑，安颉帅诸军攻滑台。沮渠蒙逊遣使朝贡。壬寅，封寿光侯叔孙建为丹杨王。

十二月丁卯，赫连定弟社于度洛孤面缚出降，平凉平，收其珍宝。定长安、临晋、武功守将皆奔走，关中平。壬申，车驾还东，留巴东公延普等镇安定。

四年春正月壬午，车驾次木根山，大猷君臣。丙申，宋将檀道济、王仲德从清水救滑台。丹杨王叔孙建、汝阴公长孙道生拒之，道济等不敢进。

是月，赫连定灭乞伏慕末。

二月辛酉，安颉、司马楚之平滑台。癸酉，车驾还宫，饮至策勋，告于宗庙，赐留台百官各有差。战士赐复十年。定州人饥，诏开仓以振之。宋将檀道济、王仲德东走。三月庚戌，冠军将军安颉献宋俘万余人，甲兵三万。

夏六月，赫连定北袭沮渠蒙逊，为吐谷浑慕璆所执。闰月乙未，蠕蠕遣使朝贡。诏散骑侍郎周绍使于宋。

秋七月己酉，行幸河西。起承华宫。八月乙酉，沮渠蒙逊遣子安周入侍。吐谷浑慕璆遣使奉表，请送赫连定。

己丑,以慕瓚为大将军,封西秦王。

九月癸丑,车驾还宫。庚申,加太尉长孙嵩柱国大将军,以左光禄大夫崔浩为司徒,征西大将军长孙道生为司空。癸亥,诏兼太常李顺持节拜河西王沮渠蒙逊为假节、加侍中、都督凉州及西域羌戎诸军事、行征西大将军、太傅、凉州牧、凉王。

壬申,诏曰:“范阳卢玄、博陵崔绰、赵郡李灵、河间邢颖、勃海高允、广平游雅、太原张伟等皆贤俊之胄,冠冕州邦,有羽仪之用。《易》曰:‘我有好爵,吾与尔靡之。’如玄之比,隐迹衡门,不曜名誉者,尽敕州郡以礼发遣。”遂征玄等。州郡所遣至者数百人,皆差次叙用。

冬十月戊寅,诏司徒崔浩改定律令。行幸漠南。十一月丙辰,北部敕勒莫弗库若于率其部数万骑驱鹿兽数百万诣行在所。帝因而大狩,以赐从者,勒石漠南,以记功德。宜城王奚斤坐事降爵为公。十二月,车驾还宫。

延和元年春正月丙午,尊保太后为皇太后,立皇后赫连氏,以皇子晃为皇太子,谒于太庙,大赦改元。三月丁未,追赠夫人贺氏为皇后。壬申,西秦王吐谷浑慕瓚送赫连定于京师。

夏五月,宋人来聘。六月庚寅,车驾伐和龙。诏尚书左仆射安原等屯于漠南,以备蠕蠕。辛卯,诏兼散骑常侍邓颖使于宋。

秋七月己巳,车驾至和龙,穿堑以守之。是月,筑东宫。九月乙卯,车驾西还。徙营丘、成周、辽东、乐浪、带方、玄菟六郡人三万家于幽州,开仓以振之。

冬十月,吐谷浑慕瓚遣使朝贡。十一月己巳,车驾至自和龙。十二月己丑,冯弘子长乐公崇及其母弟朗、朗弟遹以辽西内属。先是,辟召贤良而州郡多逼遣之,诏以礼中喻,任其进退。

二年春二月庚午,诏兼鸿胪卿李继持节假冯崇车骑大将军、辽西王,承制,听置尚书已下。壬午,诏兼散骑常侍宋宣使于宋。

夏四月,沮渠蒙逊死,以其子牧犍为车骑将军,改封河西王。

六月,遣永昌王健、尚书左仆射安原督诸军讨和龙。辛巳,诏乐安王范发秦、雍兵一万筑小城于长安城内。

秋八月,辽西王冯崇上表求降其父,帝不听。九月,宋人来聘,并献驯象一。戊午,诏兼大鸿胪卿崔颢持节拜征虏将军杨难当为征南大将军、仪同三司,封南秦王。

冬十二月己巳,大赦天下。辛未,幸阴山北。诏兼散骑常侍卢玄使于宋。

三年春正月乙未,车驾次于女水,大飨群臣。戊戌,冯弘遣使求和,帝不许。丙辰,南秦王杨难当克汉中,送雍州流人七千家于长安。二月戊寅,诏以频年屡征,有事西北,运输之役,百姓勤劳,令郡县括贫富以为三级,富者租赋如常,中者复二年,下穷者复三年。辛卯,车驾还宫。三月甲寅,行幸河西。

闰月甲戌,秦王赫连昌叛走,丙子,河西候将格杀之,验其谋反,群弟皆伏诛。己卯,车驾还宫。进彭城公粟爵为王。

秋七月辛巳,东宫成,备置屯卫,三分西宫之一。壬午,行幸美稷,遂至隔城。命诸军讨山胡白龙于西河。九月戊子,克之,斩白龙及其将帅,屠其城。

冬十一月,车驾还宫。十二月甲辰,行幸云中。

太延元年春正月己未朔,日有蚀之。壬午,降死罪刑已下各一等。癸未,出道武、明元宫人,令得嫁。甲申,大赦改元。二月庚子,蠕蠕、焉耆、车师各遣使朝贡。诏长安及平凉人徙在京师其孤老不能自存者,听还乡里。丁未,车驾还宫。

夏五月庚申,进宜都公穆寿为宜都王,汝阴公长孙道生为上党王,宜城公奚斤为恒农王,广陵公娄伏连为广陵王。遣使者二十辈使西域。甲戌,行幸云中。

六月甲午,诏曰:“去春小旱,东作不茂,忧勤克己,祈请灵祇。岂朕精诚有感,何报应之速。云雨霈流,流泽沾润。有鄙妇人持方寸玉印诣潞县侯孙家,既而亡去,莫知所在。印有三字,为龙鸟之形,要妙奇巧,不类人迹,文曰‘旱疫平’。推寻其理,盖神灵之报应也。比者以来,桢瑞仍臻,甘露流液,降于殿内;嘉瓜合蒂,生于中山;野木连理,殖于魏郡;在先后载诞之乡,白燕集于盛乐旧都,玄鸟随之,盖有千数;嘉禾频岁合秀于恒农;白兔并见于勃海;白雉三只又集于平阳太祖之庙。天降嘉祥,将何德以酬之?其令天下大酺五日,礼报百神,守宰祭界内名山大川,上答天意。”丙午,高丽、郡善国并遣使朝贡。

秋七月,田于柮阳。己卯,乐平王丕等五将东伐,至和龙,徙男女六千口而还。八月丙戌,行幸河西。粟特国遣使朝贡。九月,车驾还宫。

冬十月癸卯,尚书左仆射安原谋反,伏诛。甲辰,行幸定州,次于新城宫。十一月己巳,校猎于广川。丙子,行幸鄯,祀密太后庙。诸所过亲问高年,褒礼贤俊。十二月癸卯,遣使者以太牢祀北岳。

二年春正月甲寅,车驾还宫。二月戊子,冯弘遣使朝贡,求送侍子,帝不许。壬辰,遣使者十余辈诣高丽、东夷诸国,诏喻之。三月丙辰,宋人来聘。辛未,遣平东将军慕容、安西将军古弼讨冯弘。弘求救于高丽,高丽遣其大将葛莫卢迎之。

夏四月甲申,皇子小儿、苗儿并薨。五月乙卯,冯弘奔高丽。戊午,诏散骑常侍封拔使高丽,征送冯弘。丁卯,行幸河西。

赫连定之西也。杨难当窃据上邦,秋七月庚戌,命乐平王丕等讨之。诏散骑常侍游雅使于宋。八月丁亥,遣使六辈使西域。帝校猎于河西,诏广平公张黎发定州七郡一万二千人通莎泉道。甲辰,高车国遣使朝贡。

九月庚戌,乐平王丕等至略阳,难当奉诏摄上邦守。高丽不送冯弘,帝将伐之,纳乐平王丕计而止。

冬十一月己酉,幸柮阳。驱野马于云中,置野马苑。闰月壬子,车驾还宫。乙丑,改封颍川王提为武昌王。河西王沮渠牧犍遣使朝贡。

是岁,吐谷浑慕瓚死。

三年春正月癸未,中山王慕蕤。戊子,太尉、北平王长孙嵩薨。乙巳,丹杨王叔孙建薨。二月乙卯,行幸幽州,存恤孤老,问人疾苦。还幸上谷,遂至代,所过复田租之半。三月己卯,车驾还宫。丁酉,宋人来聘。

夏五月己丑，诏天下吏人得举告守令不如法者。丙申，行幸云中。

秋七月戊子，使永昌王健、上党王长孙道生讨山胡白龙余党于西河，灭之。八月甲辰，行幸河西。九月甲申，车驾还宫，丁酉，遣使者拜西秦王慕璩弟慕利延为镇西大将军、仪同三司，改封西平王。

冬十月癸卯，行幸云中。十一月壬申，车驾还宫。

是岁，河西王沮渠牧犍世子封坛来朝，高丽、契丹、龟兹、悦般、焉耆、车师、粟特、疏勒、乌孙、渴盘陟、鄯善、破洛那、者舌等国各遣使朝贡。

四年春三月庚辰，鄯善王弟素延耆来朝。癸未，罢沙门年五十以下。江阳王根薨。是月，高丽杀冯弘。

夏五月戊寅，大赦。

秋七月壬申，车驾北伐。

冬十一月丁卯朔，日有蚀之。十二月，车驾至自北伐。上洛巴泉革等相帅内附。诏兼散骑常侍高雅使于宋。

五年春正月庚寅，行幸定州。三月辛未，车驾还宫。庚寅，以故南秦王世子杨保宗为征南大将军、秦州牧、武都王，镇上邽。

夏五月癸未，遮逸国献汗血马。

六月甲辰，车驾西讨沮渠牧犍。侍中、宜都王穆寿辅皇太子决留台事，大将军长乐王嵇敬、辅国大将军建宁王崇二万人屯漠南，以备蠕蠕。

秋七月己巳，车驾至上郡属国城，大飨群臣，讲武马射。壬午，留輜重，分部诸军。八月丙申，车驾至姑臧，牧犍兄子祖逾城来降。乃分军围之。

九月丙戌，牧犍与左右文武五千人面缚军门，帝解其缚，待以藩臣之礼。收其城内户口二十余万，仓库珍宝不可称计。进张掖公秃发保周爵为王，与龙骧将军穆羆、安远将军源贺分略诸郡。牧犍弟张掖太守宜得西奔酒泉太守无讳，后奔晋昌；乐都太守安周南奔吐谷浑。

戊子，蠕蠕犯塞，遂至七介山，京都大骇。皇太子命上党王长孙道生等拒之。

冬十月辛酉，车驾还宫。徙凉州人三万余家于京师。留乐平王丕、征西将军贺多罗镇凉州。癸亥，遣张掖王秃发保周喻诸部鲜卑，保周因率诸部叛于张掖。十一月乙巳，宋人来聘，并献驯象一。十二月壬午，车驾至自西伐，饮至策勋，告于宗庙。杨难当寇上邽，镇将元勿头讨走之。

是岁，鄯善、龟兹、疏勒、焉耆、高丽、粟特、渴盘陟、破洛那、悉居半等国并遣使朝贡。

太平真君元年春正月己酉，沮渠无讳围酒泉。辛未，分遣侍臣巡行州郡，观察风俗，问人疾苦。二月己巳，诏假通直常侍邢颖使于宋。发长安人五千浚昆明池。三月，酒泉陷。

夏四月戊午朔，日有蚀之。庚辰，沮渠无讳寇张掖。秃发保周屯删丹。六月丁丑，皇孙浚生，大赦改元。

秋七月，行幸阴山。己丑，永昌王健大破秃发保周，走之。丙申，保太后竇氏崩于行宫。癸丑，保周自杀，传首京师。八月甲申，沮渠无讳降。九月壬寅，车驾还宫。

是岁，州镇十五饥，诏开仓振恤之。以河南王曜子翔儿为河间王，后改封略阳王。

二年春正月癸卯，拜沮渠无讳为征西大将军、凉州牧、酒泉王。三月辛卯，葬惠太后于崑山。庚戌，新兴王俊、略阳王翔儿有罪，赐为公。辛亥，封蠕蠕郁久阔乞归为朔方王，沮渠万年为张掖王。

夏四月丁巳，宋人来聘。

秋八月辛亥，诏散骑侍郎张伟使于宋。九月戊戌，永昌王健薨。

冬十一月庚子，镇南大将军奚眷平酒泉。十二月丙子，宋人来聘。

三年春正月甲申，帝至道坛，亲受符策，备法驾，旗帜尽青。三月壬寅，北平王长孙颢有罪，削爵为侯。

夏四月，酒泉王沮渠无讳走渡流沙，据鄯善。凉武昭王孙李宝据敦煌，遣使内附。五月，行幸阴山北。六月丙戌，杨难当朝于行宫。先是，起殿于阴山北，殿成而难当至，因曰广德焉。

秋八月甲戌晦，日有蚀之。

冬十月己卯，封皇子伏罗为晋王，翰为秦王，谭为燕王，建为楚王，余为吴王。十二月辛巳，太保、襄城公卢鲁元薨。丁酉，车驾还宫。李宝遣使朝贡，以宝为镇西大将军、开府仪同三司、沙州牧、敦煌公。

四年春正月庚午，行幸中山。二月丙子，次于恒山之阳，诏有司刊石勒铭。是月，克仇池。三月庚申，车驾还宫。

夏四月，武都王杨保宗谋反，诸将禽送京师。氏、羌复推保宗弟文德为主，围仇池。六月庚寅，诏复人贳赋三年，其田租岁输如常，牧守不妄有征发。癸巳，大阅于西郊。

九月辛丑，行幸漠南。甲辰，舍輜重，以轻骑袭蠕蠕，分军为四道。

冬十一月甲子，车驾还至朔方。诏曰：“夫阴阳有往复，四时有代谢，授子任贤，盖古今不易之令典也。其令皇太子副理万机，总统百揆。诸功臣勤劳日久，皆当以爵归第，随时朝请，饗宴朕前，论道陈谏而已，不宜复烦以剧职。更举贤俊，以备百官，明为科制，以称朕心。”十二月辛卯，车驾至自北伐。

五年春正月壬寅，皇太子始总百揆。侍中中书监宜都王穆寿、司徒东郡公崔浩、侍中广平公张黎、侍中建兴公古弼辅太子以决庶政。诸上书者皆称臣，上疏仪与表同。戊申，诏自王公已下至于庶人，私养沙门、巫及金银工巧之人在其家者，皆遣诣官曹，限今年二月十五日。过期不出，巫、沙门身死，主人门诛。庚戌，诏自三公已下至于卿士，其子息皆诣太学，其百工伎巧胥卒子息当习其父兄所业，不听私立学校，违者师身死，主人门诛。

二月辛未，中山王辰等八人以北伐后期，斩于都南。癸酉，乐平王丕薨。庚辰，行幸庐。三月戊戌，大会于都南。遣使者四驛使西域。甲辰，车驾还宫。

夏四月乙亥，太宰、阳平王杜超为帐下所杀。五月丁酉，行幸阴山北。六月，西平王吐谷浑慕利延杀其兄子纬代，纬代弟叱力延等来奔，乞师。以叱力延为归义王。

秋八月乙丑，田于河西。壬午，诏员外散骑常侍高济使于宋。九月，帝自河西至于马邑，观于崑川。己亥，车驾还宫。丁未，行幸漠南。

冬十月癸未，晋王伏罗大破慕利延，慕利延走奔白兰，其部一万三千内附。十一月，宋人来聘。十二月丙戌，车驾还宫。

六年春正月辛亥，行幸定州，引见长老，存问之。诏兼员外散骑常侍宋愔使于宋。二月，遂西幸上党，观连理树于玄氏。至吐京，讨徙叛胡，出配郡县。三月庚申，车驾还宫。诏诸有疑狱皆付中书，以经义量决。

夏六月戊子朔，日有蚀之。壬辰，北巡。

秋八月壬辰，散骑常侍成周公万度归以轻骑至鄯善，执其王真达，与诣京师。帝大悦，厚待之。车驾幸阴山北，次于广德宫。诏发天下兵，三取一，各当戒严，以须后命。徙诸种杂人五千余家于北边。令人北徙畜牧至广漠，以饵蠕蠕。壬寅，征西大将军、高凉王那等讨吐谷浑慕利延。军到莫头城，慕利延驱其部落西度流沙，那急追，故西秦王慕璆世子被襄逆军拒战，那击破之。中山公杜丰追度三危，至雪山，禽被襄及慕利延兄子什归、炽盆子成龙，送于京师。慕利延遂西入于阗国。

九月，卢水胡盖吴聚众反于杏城。

冬十一月，高凉王那振旅还京师。庚申，辽东王突獬头薨。河东蜀薛永宗聚党入汾曲，西通盖吴，受其位号。盖吴自号天台王，署百官。辛未，车驾还宫。选六州兵勇猛者，使永昌王仁、高凉王那分领为二道，南略淮、泗以北。徙青、徐之人以实河北。癸未，西巡。

七年春正月戊辰，车驾次东雍，禽薛永宗，斩之。其男女无少长皆赴水死。辛未，南幸汾阴。盖吴退走北地。二月丙戌，幸长安，存问父老。丁亥，幸昆明池，遂田于岐山之阳。所过诛与盖吴通谋反害守将者。

三月，诏诸州坑沙门，毁诸佛像，徙长安城内工巧二千家于京师。

夏四月甲申，车驾至自长安。戊子，毁郾城五层佛图，于泥像中得玉玺二，其文皆曰“受命于天，既寿永昌”。其一刻其旁曰“魏所受汉传国玺”。

五月，盖吴复聚杏城，自号秦地王。丙戌，发司、幽、定、冀四州十万人筑畿上塞围，起上谷，西至于河，广袤皆千里。六月癸未朔，日有蚀之。

秋八月，盖吴为其下人所杀，传首京师。复略阳公羯儿王爵。

八年春正月癸未，行幸中山。三月，河西王沮渠牧犍谋反，伏诛。

夏五月，车驾还宫。六月，西征诸将扶风公处真等八将坐盗没军资，所在虏掠，赃各千万计，并斩之。

秋八月，乐安王范薨。

冬十一月，侍中、中书监、宜都王穆寿薨。十二月，晋王伏罗薨。

九年春正月，宋人来聘。二月癸卯，行幸定州。山东人饥，诏开仓振之。罢塞围作。遂西幸上党。诏于壶关东北大王山累石为三封，又斩其凤皇山南足以断之。三月，车驾还宫。

夏五月甲戌，以交趾公韩拔为假征西将军、领护西戎校尉、鄯善王，镇鄯善，赋役其入，比之郡县。六月辛酉，行幸广德宫。丁卯，悦般国遣使求与王师俱讨蠕蠕。帝许之。

秋八月，诏中外诸军戒严。九月乙酉，练兵于西郊。丙戌，幸阴山。

是月，成周公万度归千里驿上，大破焉耆国，其王鸠尸卑那奔龟兹。

冬十月辛丑，恒农王奚斤薨。癸卯，以婚姻奢靡，丧葬过度，诏有司更为科限。癸亥，大赦。十二月，诏成周公万度归自焉耆西讨龟兹。皇太子朝于行宫，遂从北讨。至受降城，不见蠕蠕，因积粮城内，留守而还。北平王长孙教坐事降爵为公。

十年春正月戊辰朔，帝在漠南，大猎百僚。甲戌，蠕蠕吐贺真惧，远遁。三月，搜于河西。庚寅，车驾还宫。

夏四月丙申朔，日有蚀之。九月，阅武于磧上，遂北伐。

冬十月庚子，皇太子及群官奉迎于行宫。十二月戊申，车驾至自北伐。己酉，以平昌公托真为中山王。

十一年春正月乙丑，行幸洛阳，所过郡国，皆亲对高年，存恤孤寡。二月甲午，大搜于梁川。皇子真薨。是月，大修宫室，皇太子居于北宫。车驾遂征悬瓠。

夏四月癸卯，车驾还宫，赐从者及留台郎吏已上生口各有差。六月己亥，诛司徒崔浩。辛丑，北巡阴山。

秋七月，宋将王玄谟攻滑台。八月癸亥，田于河西。癸未，练兵于西郊。九月辛卯，车驾南伐。癸巳，皇太子北伐，屯于漠南。吴王余留守京都。庚子，曲赦定、冀、相三州死罪已下。

冬十月乙丑，车驾济河，玄谟弃军而走，乃命诸将分道并进。车驾自中道，十一月辛卯，至邹山。使使者以太牢祀孔子。是月，瑛盾国献师子一。十二月丁卯，车驾至淮。诏刘蕡著作筏数万而济，淮南皆降。癸未，车驾临江，起行宫于瓜步山。诸军同日皆临江，所过城邑，莫不望尘奔溃，其降附者不可胜数。甲申，宋文帝使献百牢，贡其方物，又请进女于皇孙，以求和好。帝以师婚非礼，许和而不许婚，使散骑侍郎夏侯野报之。帝诏皇孙为书，致马通问焉。

正平元年春正月丙戌朔，大会群臣于江上，文武受爵者二百余人。丁亥，车驾北旋。二月癸未，次于鲁口。皇太子朝于行宫。三月己亥，车驾至自南伐，饮至策勋，告于宗庙，以降人五万余家分置近畿，赐留台文武所获军资生口各有差。

夏五月壬寅，大赦。六月壬戌，改元。车师国王遣子入侍。诏以刑网太密，犯者更众，命有司其案律令，务求厥中，自余有不便于人者，依比增损。诏太子少傅游雅、中书侍郎胡方回等改定律制。略阳王羯儿、高凉王那有罪赐死。戊辰，皇太子薨。壬申，葬景穆太子于金陵。

秋七月丁亥，行幸阴山。省诸曹吏员三分之一。九月癸巳，车驾还宫。

冬十月庚申，行幸阴山。宋人来聘。诏殿中将军郎法祐使于宋。己巳，司空、上党王长孙道生薨。十二月丁丑，车驾还宫。封皇孙浚为高阳王，寻以皇孙世嫡，不宜在藩，乃止。改封秦王翰为东平王，燕王谭为临淮王，楚王建为广阳王，吴王余为南安王。

二年春正月庚辰朔，南来降人五千余家于中山谋叛，州军讨平之。冀州刺史、张掖王沮渠万年与降人通谋，赐死。

三月甲寅，中常侍宗爱构逆，帝崩于永安宫，时年四十五。秘不发丧。爱又矫皇后令，杀东平王翰，迎南安王余立，大赦，改元为永平。尊谥曰太武皇帝，葬于云中金陵，庙号世祖。

帝生不逮密太后，及有所识，言则悲恸，哀感傍人，明元闻而嘉叹。及明元不豫，衣不解带。性清俭率素，服御饮膳，取给而已，不好珍丽，食不二味，所幸昭仪、贵人，衣无兼彩。群臣白帝，更峻京邑城隍以从《周易》设险之义，又陈萧何杜牧之说。帝曰：“古人有言，在德不在险。屈丐慕土筑城，而朕灭之，岂在城也？今天下未平，方须人力，土功之事，朕所未为。萧何之对，非雅言也。”每以财者军国之本，无所轻费。至于赏赐，皆是勋绩之家，亲戚爱宠，未尝横有所及。

临敌，常与士卒同在矢石间，左右死伤者相继，而帝神色自若，是以人思效命，所向无前。命将出师，指授节度，从命者无不制胜，违爽者率多败失。性又知人，拔士于卒伍之中，唯其才效所长，不论本末。兼甚严断，明于刑赏，功者赏不遗贱，罪者刑不避亲，虽宠爱之，终不亏法。常曰：“法者，朕与天下共之。何敢轻也。”故大臣犯法，无所宽假。

雅长听察，瞬息之间，下无以措其奸隐。然果于诛戮，后多悔之。司徒崔浩死后，帝北伐，时宣城公李孝伯疾笃，传者以为卒，帝闻而悼之，谓左右曰：“李宣城可惜。”又曰：“朕向失言，崔司徒可惜，李宣城可哀。”寝罢雅意，皆此类也。

景穆皇帝讳晃，太武皇帝之长子也，母曰贺夫人。延和元年正月丙午，立为皇太子，时年五岁。明慧强识，闻则不忘。及长，好读经史，皆通大义。太武甚奇之。及西征凉州，皇太子监国。

初，太武之伐河西，李顺等咸言姑臧无水草，不可行师。太子有疑色。及车驾至姑臧，乃诏太子曰：“姑臧城东西门阙外涌泉，合于城北，其大如河，泽草茂盛，可供大军数年。人之多言，亦可恶也。”太子谓宫臣曰：“为人臣不实若此，岂是忠乎！吾初闻有疑，但帝决行耳。几误人大事，言者复何面目见帝也。”

真君四年，从征蠕蠕，至鹿浑谷，与贼遇。虏惶怖扰乱，太子言于太武曰：“宜速进击，掩其不备。”尚书公刘洁固谏，以为尘盛贼多，须军大集。太子曰：“此由贼惶怖，何有营上而有此尘？”太武疑之，遂不急击，蠕蠕远遁。既而获虏候骑，乃云不觉官军卒至，上下惶惧，北走经六七百里，知无追者，乃徐行。帝深恨之。自是太子所言军国大事，多见纳用，遂知万机。及临国，命有司使百姓有牛家以人牛相贸，又禁饮酒杂戏弃本沾贩者，于是垦田大增。

正平元年六月戊辰，薨于东宫，时年二十四。庚午，命持节兼太尉张黎、兼司空竇瑾奉策即柩谥景穆太子。文成即位，追尊为景穆皇帝，庙号恭宗。

高宗文成皇帝讳浚，景穆皇帝之长子也，母曰闾氏。真君元年六月，生于东宫。帝少聪达，太武常置左右，号世嫡皇孙。年五岁，太武北巡，帝从在后，逢虏帅桎一奴，将加罪。帝谓曰：“奴今遭我，汝宜释之。”帅奉命解缚。太武闻之曰：“此儿虽小，欲以天于自处。”意奇之。及长，风格异常，每参决大政可否。

正平二年三月，中常侍宗爱弑逆，立南安王余。十月丙午朔，又贼余。于是殿中尚书长孙渴侯与尚书陆丽奉迎世嫡皇孙。

兴安元年冬十月戊申，皇帝即位，于永安前殿，大赦，改元，正平二年为兴安。以驃骑大将军元寿乐为太宰、都督中外诸军、录尚书事，以尚书长孙渴侯为尚书令、仪同三司。十一月丙子，二人争权，并赐死。癸未，广阳王建、临淮王谭薨。甲申，皇妣闾氏薨。进平南将军、宋子侯周祖爵为乐陵王，南部尚书、章安子陆丽为平原王，文武各加位一等。壬寅，追尊景穆太子为景穆皇帝，妣闾氏为恭皇后，尊保母常氏为保太后。

十二月戊申，相葬恭皇后于金陵。乙卯，初复佛法。丁巳，以乐陵王周祖为太尉，平原王陆丽为司徒，镇西将军杜元宝为司空。保达、沙猜等国各遣使朝贡。戊寅，进建业公陆侯爵为东平王，进广平公杜遗爵为王。癸亥，诏以营州蝗，开仓振恤。甲子，太尉、乐陵王周祖有罪赐死。进濮阳公闾若文爵为王。

二年春正月辛巳，进司空杜元宝爵为京兆王。广平王杜遗薨。进尚书仆射、东安公刘尼爵为王。封建宁王崇子丽为济南王。癸未，诏与百姓杂调十五。丙戌，进尚书、西平公源贺爵为王。

二月己未，司空、京兆王杜元宝谋反，伏诛。建宁王崇、崇子济南王丽为元宝所引，各赐死。乙丑，发京师五千人穿天泉池。是月，宋太子劭杀文帝。三月，尊保太后为皇太后。进安丰公闾武皮爵为河间王。

夏五月，宋孝武帝杀太子劭而自立。闰月乙亥，太皇太后赫连氏崩。

秋七月辛亥，行幸阴山。濮阳王闾若文、永昌王仁谋反。乙卯，仁赐死，若文伏诛。己巳，车驾还宫。是月，筑马射台于南郊。八月戊戌，诏曰：“朕即位以来，风雨顺序，边方无事，众瑞兼呈，又于苑内获方寸玉印，其文曰‘子孙长寿’。群公卿士咸曰休哉，岂朕一人，克臻斯应，实由于天地祖宗降祐之所致也。思与兆庶，共兹嘉庆，其令百姓大酺三日，降殊死已下囚。”九月壬子，闾武于南郊。

冬十一月辛酉，行幸信都、中山，观察风俗。十二月甲午，车驾还宫。复北平公长孙敦王爵。

是岁，疏勒、渴盘陟、库莫奚、契丹、靺鞨等国各遣使朝贡。

兴光元年春正月乙丑，以侍中、河南公伊藺为司空。二月甲午，帝至道坛，登受图箓。礼毕，曲赦京师。

夏六月，行幸阴山。

秋七月丙申朔，日有蚀之。庚子，皇子弘生。辛丑，大赦改元。八月甲戌，赵王深薨。乙亥，车驾还宫。己丑，皇叔武头、龙头薨。九月，库莫奚国献名马，有一角，状如麟。闭都门，大索三日，获奸人亡命数百人。

冬十一月戊戌，行幸中山，遂幸信都。十二月丙子，还幸灵丘，至温泉宫。庚辰，车驾还宫。出于、叱万单等国各遣使朝贡。

大安元年春正月辛酉，奉太武、景穆神主于太庙。乐平王拔有罪，赐死。二月癸未，武昌王提薨。三月己亥，以太武、景穆神主入太庙，改元，曲赦京师死囚已下。

夏六月壬戌，诏名皇子弘，曲赦。癸酉，诏尚书穆真等二十人巡行州郡，观察风俗，大明赏罚。

冬十月庚午，以辽西公常英为太宰，进爵为王。

是岁，遮逸、波斯、疏勒等国各遣使朝贡。

二年春正月乙卯，立皇后冯氏。二月丁巳，立皇子弘为皇太子，大赦。